

Satu lawan satu di DUN Kuala Besut
Malaysian Insider
July 12 , 2013
Oleh Mohd Farhan Darwis

Pilihan Raya Kecil (PRK) Dewan Undangan Negeri (DUN) Kuala Besut menyaksikan pertembungan satu lawan satu antara calon Barisan Nasional (BN) Tengku Zaihan Che Ku Abdul Rahman dan calon PAS Endut@Azlan Yusof.

Perkara itu disahkan Pegawai Pengurus Suruhanjaya Pilihan Raya (SPR), A Rahim Jusoh di Kompleks Rakan Muda Daerah Besut hari ini.

Azlan, atau lebih dikenali sebagai Che Long menyerahkan kertas pencalonannya pada 9.05 pagi, manakala Tengku Zaihan pada 9.10 pagi.

SPR menetapkan Pilihan Raya Kecil (PRK) DUN Kuala Besut akan dilaksanakan pada 24 Julai dengan pengundian awal akan berlangsung pada 20 Julai.

Kuala Besut mempunyai 17,683 pengundi berdaftar.

Pengarah Pilihan Raya BN bagi DUN Kuala Besut, Tan Sri Muhyiddin Yassin mengharapkan pengundi kawasan berkenaan yang mengundi BN dalam Pilihan Raya 2013 sekali lagi akan mengulangi sokongan mereka.

"Malahan kami mengharapkan pengundi lain akan turut menyokong calon kita.

"Kita ada penuh keyakinan terhadap Tengku Zaihan, kelayakan, kelulusan, sokongan masyarakat dan tugas beliau sebagai jurutera memberi kelebihan calon kita," kata Muhyiddin pada sidang media sejurus penamaan calon.

Sementara kemenangan agak sukar buat PAS, BN sebaliknya mengharapkan akan terus kekal di Kuala Besut bagi mengelakkan berlakunya penggantungan DUN ekoran jumlah kerusi yang sama.

BN memenangi 17 daripada 32 kerusi DUN di Terengganu dengan baki 15 dimenangi Pakatan Rakyat (PR).

PAS pula bagaimanapun mengharapkan supaya berlaku DUN tergantung dengan 16:16 kerusi, kerana menurut mereka ia akan memberikan kelebihan kepada penduduk Terengganu. - 12 Julai, 2013.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/satu-lawan-satu-di-dun-kuala-besut/>